

Protocol no. 104**Sezzüda da lündeschdi, als 11 avuost 2014 08.00h - 12.00h**

Preschaints: Albert Mayer, Andri Poo, Men Caviezel, Marianne Werro-Lehmann e Marco Fallet (protocol)
S-chüsà: Dumeng Jann, caus'absenza da vacanzas.

Pro las trattativas 931 – 934, il manader tecnic, Christian Poo.

Pro la trattativa proget reservats da god; ils silviculturs, Duri Könz e Mario Riatsch e la suprastanza dal cumün da vaschins, Maria Sedlacek, Chasper Ruben e Not Buchli.

Protocol

Il protocol no. 103 da la sezzüda da lündeschdi, als 14 da lügl 2014 vain approvà.

931 021 FABRICA
Proget Büglöl; lingia nouva e regulaziun da l'aua

Il permiss davart da l'uffizi chantunal (proceder BAB) ais avantman. Uschè conced'eir il cussagl in möd retroactiv il permiss da fabrica cun vusch unanima. Cun quai ais uossa quista fatschenda, la quala vaiva dat andit ad ün abitant ad interveziuns, scholta in möd definitiv.

932 021 FABRICA
Energia Engiadina SA; Trafo Chavorgia; parcella no. 3143

Davart da l'inspeccorat federal per curraint ferm e l'uffizi chantunal d'energia ais la dumonda da fabrica gnüda trattada in sen positiv. Uschè conced'eir il cussagl il permiss pella construcziun d'üna staziun da trafo nouva.

933 021 FABRICA
Energia Engiadina; transfuormatur nouv a Spinatscha

Davart da l'inspeccorat federal per curraint ferm e l'uffizi chantunal d'energia ais la dumonda da fabrica gnüda trattada in sen positiv. Uschè vain quella publichada in cumün sco eir i'l fögl uffizial, seguond pretaisas da l'uffizi chantunal.

934 021 FABRICA
Ludwig Nogler; implant fotovoltaic stalla Flüs; parcella no. 1006

La dumonda ais gnüda trattada da la cumischiun da fabrica. Seguond la nouv'ordinaziun davart la planisaziun dal territori dal Grischun as splaja uossa il proceder per similas dumondas, a partir dals 1. mai 2014, be amo sülla procedura d'annunzcha. Uschè conced'el cussagl il permiss da fabrica.

935 120

UFFIZI CIRCUITAL E DISTRICTUAL
Surdatta d'uffizis circuitals a la PEB

La Regenza ha decis da schoglier ils circuls pür ün on plü tard sco planisà, dimena pels 1. da schner 2016. Latras restessan ils uffizis fin sün quella data suot ils circuls. La suprastanza da la PEB ed eir ils mastrals sun però da la vis, da surdar ils uffizis a la PEB fingià sco planisà pels 1 da schner 2015. Il cussagl ha tut cogniziun dal protocol da la sezzüda dals 23 gün 2014 dals mastrals ed eir da la charta da la PEB als mastrals.

Il vicemastral, Mario Denoth, suottametta uossa als cumüns da trattar la dumonda da surdar ils uffizis, chi sun hoz amo suot il circul, in möd antizipà a la PEB. I's tratta dals uffizis da stadi civil, curatella professionala, uffizi da scussiun ed uffizi da fallimaint.

In basa da la documainta avantman decid'il cussagl da surdar quels uffizis suot la bachetta da la PEB e quai cun vigur a partir dals 1. da schner 2015.

936 801

MELDRAMAIN DA PASCULAZIUN E FUOND
Proget sauaziun Sent; ulteriur proceder

Il cussagl ha tut cogniziun da la charta dal büro Kindschi, cun quala vain infuormà da's avair cunvgni cul uffizi chantunal e d'avair trattà cul büro Caprez, Scuol a regard la cuntinuaziun dal proget. Il cussagl tratterà quella fatschenda e trarà lura a temp ütil sia decisiun.

937 620.314

Mantegnimaint vias
Proget sanaziun via da god Uina 4/5; surdatta da las lavuors d'impressari (SIE Sent 2014/15)

L'uffizi da god e privels da la natüra dal Grischun meridiunal, Zuoz vaiva pretais las offertas e tillas evaluadas. Quel surdà uossa la fatschenda al cussagl pella surdatta da las lavuors. El surdà quellas a la ditta Impraisa Mario Sarl., Ramosch. Caus'ils dons da las strasoras d'ultimamaing in val Uina ais però quella surdatta gnüda sistida ed il proget previs vain valütà danouv. A temp ütil gnarà lura surdat il rest da las lavuors.

938

DIVERSAS SCHEFS

Festa da chanzuns Sent / Tarasp 2014

Flurin Rüedlinger organisescha quell'occurranza e dumond'al cumün perün sustegn. Il cussagl decida da contribuir l'import da fr. 500.00 ed ultra da quai da relaschar il fit pella sala cumünala per quel temp chi vain fat adöver da tala.

Gruppa da plumpas Engiadina / partecipaziun a l'inscunter federal da plumpas e s-chellas

Per quell'occurranza dumonda la gruppa per ün sustegn finanziel. Il cussagl decida da contribuir l'import da fr. 250.00.

Società d'Ütil public Sent / proget Peider Lansel

Quella prevezza d'organisar üna festa commemorativa pel grond poet sentiner Peder Lansel e dumond'al cumün per ün sustegn finanziel. Il cussagl valüta quai sco ün'important aspet cultural da nos cumün e decida da contribuir l'import da fr. 2'500.00.

Bain Zuort / rend'attent resp. dumonda per üna signalisaziun plü optimala

Guno Fischer dal bain Zuort as drizza als cumüns Valsot e Sent, cha la signalisaziun ed il rend'attent sül bain Zuort, sur Ramosch – Vnà mo eir a Sent – Val Sinestra nun ais sufficianta e stopcha gnir optimada. El apella als respusabels dals duos cumüns da s'intermetter in fatschenda, causa cha da quella masüra saja la gestiun dal bain Zuort dependenta.

Il cussagl ha incletta pel giavüsche ed ais pront da sustgnair l'intent. El prevezza da trattar la fatschenda cul cumün da Valsot sco eir cul TESSVM.

Bügl in cumün / organisaziun da pulizia sco eir refacziun dal bügl a Schigliana

La pulizia dals bügl in cumün nu cuntainta plü. Il manader tecnic vain incumbenzà da s'occupar d'üna soluziun.

Plünavant decid'il cussagl da sbouar il bügl existent a Schigliana e da rimplazzar quel cun ün nouv. Davart da la società Sturnels da Sent ais gnü miss in vist'üna somma da sustegn per quellas lavuors da ca. fr. 9'000.00. L'uffizi da fabrica s'occupa uossa dal proceder sco eir d'offertas in chosa.

TESSVM / montascha d'üna tabla per publicaziuns turisticas pro'l büro a Sent

Sün dumonda davart dal TESSVM per plazzar üna tabla vi da la fatschada vers la via maistra decid'il cussagl d'acconsentir quella. Il lö exact da quella, our dal punct estetic, ais gnü dat avant da l'uffizi da fabrica.

Padrinadi svizzer per cumüns da muntogna / acziun per ün fond da strasoras

In vist'als gronds dons cha las strasoras han chaschunà in diversas regiuns da la Bassa ha il padrinadi drizz'aint ün fond da strasoras es spisgiantà quel, sco masüra immediata, culla somma da fr. 1 miu. Uossa dumonda quel als cumüns per ün sustegn finanziel vi da quell'acziun.

Il cussagl resguarda tuot la munaida cha nos cumün ha fingià pudü tour incunter dal padrinadi e decida da contribuir l'import da fr. 1'000.00.

939

ORIENTAZIUNS

TESSVM aboccamaint cul mainagestiun, Urs Wohler / termin

Il termin ais gnü fixà in möd definitiv sün gövgia, als 21 avuost 2014 a las 18.30h. Cun quel vain it d'accord.

Realisaziun da la ruta regionala da mountainbike B32

La sezzüda da coordinaziun in fatschenda ha lö als 14 avuost 2014 a Zernez. I fa part a quella nos capo, Albert Mayer.

940

VARIA

Dons da strasoras Val Uina

M. Caviezel orientescha, chi sajan gnüdas giò diversas boudas e donnagià la punt sco eir schlavà oura la via. La gruppa forestala cullas duos impraisas ais vi da las lavuors da refacziun.

Proget reservat da gods Sent

Il capo, A. Mayer, spordsch'il salüd a la delegaziun manzunada i'l titel.

Il silvicultur, M. Riatsch orientesch'in möd introductiv sur da l'andamaint resp. sur dals pass da las lavuors preparatoricas. Pustüt s'ha ingaschà eir Antonin Hugentobler, silvicultur da Valsot, in möd considerabel, causa cha'l squitsch da temp d'eira grond.

L'indschegner forestal dal Grischun meridiunal, Duri Könz, preschaint'il proget.

Basa

Per la protecziun da la flora e fauna e pel mantegnimaint da seis spazi da viver e per proteger spezias d'animals specialas da la sdrütta vegnan miss ad ir reservats da god.

I sun da distinguar duos tips da reservats da god:

Reservats da god natürals / surfatscha 210,86ha

Là sun admissas tuottas activitats sco p.ex. chatscha, bulais, sport e.u.i. Unicamaing intervenziuns forestalas nu vegnan fattas, causa cha quels reservats garantischan in prüma lingia il svilup dal god natüral.

Reservats da god specials / surfatscha 347,88 ha

Là as tratta quai da surfatschas specialas chi servan a la protecziun da spezias e chi dessan gnir cultivadas in möd cha l'adöver dal gener dal böt dess gnir accumpli in seis spazi da viver. In quels gods vegnan eir effetuadas intervenziuns precisas e planisadas. Quelas surfatschas vegnan sgüradas a lunga vista in basa da contrats e munits cun prescripziuns a bön da la protecziun da la natüra e da la cuntrada. Las masüras vengan sustgnüdas finanzialmaing da la Confederaziun.

Il cas da nos cumün as retiran las masüras pustüt sülla protecziun da l'urugal, quai in basa d'ün concept regional elavurà. Sent cun sias surfatschas previssas fuorma per quai ün dals lös prioritaris, sper la Val Müstair obain eir la Bregiaglia.

Tuot il proget as basa e bsögna la collavuraziun tanter servezzan forestal ed ils organs da survaglianza da chatscha.

Contrats

Previs ais da stipular ün contrat da servitut pels reservats da natüra S-chalambert e La Foppa, quai tanter il cumün da vaschins sco proprietari dal god, il cumün politic sco usufructuari (Nutzungsberechtigter) ed il Chantun Grischun, rapreschantà dal departamaint da construcziun, trafic e silvicultura, cun üna dürada da 50 ons.

Ultra da quai gniss stipulà ün contrat da servitut pels reservats specials Munt e Vallorcha, quai analog sco survart manzunà, tanter il cumün da vaschins sco proprietari dal god, il cumün politic sco usufructuari (Nutzungsberechtigter) ed il Chantun Grischun, rapreschantà dal departamaint da construcziun, trafic e silvicultura, cun üna dürada da 30 ons.

Cuosts

Ils cuosts totals dal proget s'amuntan a fr. 520'000.00.

L'indemnisaziun pel reservat da natüra s'amunta annualmaing a fr. 4'217.20. La prüma transcha (per 25 ons) vain pajada subit davo l'acconsentimaint dal proget, dimena la mità cun üna somma da fr. 105'430.00, quai chi correspuonda ad ün import da fr. 20.00 pro ha.

L'indemnisaziun pel reservat special s'amunta annualmaing a fr. 1'739.40. La prüma transcha (per 15 ons) vain pajada subit davo l'acconsentimaint dal proget, dimena la mità cun üna somma da fr. 26'091.00, quai chi correspuonda ad ün import da fr. 5.00 pro ha.

M. Sedlacek manzuna, cha la suprastanza dal cumüns da vaschins va d'accord cul proget sco qua preschantà e cha quella propuonarà a la radunanza da til acconsentir. Il medem vala eir pel cumün politic, dal qual il cussagl propuonarà a la radunanza d'acceptar il proget cul credit necessari.

L'actuar:
Marco Fallet

Il capo:
Albert Mayer